

摘藻堂四庫全書薈要

子部

欽定四庫全書薈要

子部

御定淵鑑類函卷三百十七

欽定四庫全書薈要卷一萬一千七百六十五

子部

御定淵鑑類函卷三百十七

釋教部二

佛 菩薩 僧  
戒律 禪定

佛一

佛地論曰佛者覺也覺一切種智復能開覺有情如

睡夢覺故名爲佛 後魏釋老志曰凡說教大抵言生

生之類皆因行業有三世識神不滅凡爲善惡必有報

應漸積勝業陶冶麤鄙經無數形澡煉神明乃致無生

而得佛道也其間階次心行等級非一皆緣淺以至深  
藉微而為著在於積仁順蠲嗜慾習虛靜而成通照也  
其始修心則依佛法僧之三歸又有五誠去殺盜婬妄  
言飲酒大意與仁義禮智信同耳 增又曰諸佛法身

有二種義一者真實二者權應真實身謂至極之體妙  
絕拘累不得以方處期不得以形量限有感斯應體常  
湛然權應身者謂和光六道同塵萬類生滅隨時修短  
應物形由感生體非實有權形雖謝真體不遷但時無

妙感故莫得常見耳明佛生非實生滅非實滅也 牟

子曰佛者謚號也猶名三皇神五帝聖也佛乃道德之  
元祖神明之宗緒佛之言覺也恍惚變化分身散體或  
存或亡能小能大能圓能方能老能少能隱能彰蹈火  
不燒覆刃不傷在污不染在禍無殃欲行則飛坐則揚  
光故號為佛也 翻譯大論云秦言知者漢言覺也僧  
肇曰佛者何也蓋窮理盡性大覺之稱也其道虛玄固  
已妙絕常境心不可以智知形不可以象測同萬物之

為而居不為之域處言數之內而止無言之鄉非有而不可為無非無而不可為有寂寞虛曠物莫能測不知所以名故強謂之覺 又云夫佛垂化也道濟百靈法傳世也慈育萬有出則釋天前引入乃梵王後隨左輔大將由滅惡以成功右弼金剛用生善而為德三乘賢聖既肅爾以歸投八部鬼神故森然而翊衛 廣弘明篇曰釋迦起無緣之慈應有機之名語其迹也則行滿三祇相圓百劫降神而乘玉象掩耀而誕金姿三十二

祥休徵開於地府一十八梵禎瑞駭於天宮靈相周於十方神光顯乎八極述其本也久證圓明塵沙莫能算其壽早登寂照虛空無以量其體豈唯就攀枝而偉瑞徵白首而效祥猶螢光與龍燭競輝魚目共蛇珠並曜

天中記

## 佛二

增周書異記曰周昭王即位二十四年四月八日江河泉忽然泛漲井水溢出山川震動有五色光入貫太微

遍於西方畫作青紅色太史蘇由奏曰有大聖人生於西方一千年外聲教及此昭王即敕鐫石記之埋於南郊天祠前此即佛生之時也穆王五十二年二月十五日暴風忽起林木傷折天地震動西方有白虹十二道南北通過連夜不滅穆王問太史扈多曰是何徵也對曰西方有大聖人滅度哀相現耳此時佛涅槃也原普曜經曰佛兜率天降神於西域迦維衛國淨梵王宮摩耶夫人剖右脇而生時多靈瑞生而能言佛地論



曰姓釋迦號牟尼佛本相經曰牟尼佛年十九踰城出家學道勤行精進禪定六年成道具三十二相八十種好增玄妙內篇曰老子入關之西天竺維衛國國王夫人名曰淨妙老子因其晝寢乘日之精入淨妙口中後年四月八日夜半時剖右脇而生墮地即行七步舉手指天曰天下天上唯我為尊三界皆苦何可樂者於是佛教興焉周書異記曰周昭王二十四年天竺迦維衛國淨飯王妃摩耶氏夢天降金人遂有孕於四月

八日太子生於右脇名悉達多年十九入檀特山修行  
証道至穆王三年明星出時成佛號世尊於熙連河說  
大涅槃經以正法眼藏將金縷僧伽梨衣傳與弟子大  
迦葉為第一世祖行至周穆王五十二年二月十五日  
往拘尸城娑羅樹間入般涅槃在世教化四十九年是  
為釋迦牟尼 列子曰周穆王時西極之國有化人來  
入水火貫金石乘虛不墜觸實不礙千變萬化不可窮  
極穆王築通天之臺以居之其高千仞居無何謁王同

遊王執化人祛騰而上之及化人之宮意迷精喪既寤  
自失者三月化人曰吾與王神遊耳形奚動哉 本行  
經曰淨飯王嚴駕抱太子謁自在天神廟神像起禮拜  
太子足王驚曰我子於天神中更為尊勝宜字天中天  
即佛第二小字也 原隋書經籍志曰釋迦在世教化  
四十九年乃至天龍人鬼並來聽法弟子多有得道證  
果後於拘尸那城婆羅雙樹間二月十五日入般涅槃  
譯言滅度亦言常樂我淨弟子迦葉追撰述其教為十

二部後漢明帝夜夢金人飛行殿庭以問於朝而傅毅以佛對帝遣使往天竺得佛經及釋迦像自後佛法徧於中夏 增宋書曰會稽太守孟顗事佛精懇而為謝靈運所輕嘗謂顗曰得道應須慧業文人生天當在靈運前成佛必在靈運後顗深恨之 又曰范泰暮年事佛甚精於宅西立祇洹精舍 梁書曰武帝大弘佛教而親自講說太子亦素信三寶徧覽衆經乃於宮內立慧義殿專為法集之所招引名僧自立三諦法義普通

元年甘露降於慧義殿以為至德所感

太平御覽

釋氏書

曰自釋迦世尊而下為迦葉阿難中有馬鳴龍樹以至  
菩提達磨為西天二十八祖一祖摩訶迦葉二祖阿難  
三祖商那和修四祖優波鞠多五祖提多迦六祖彌遮  
加七祖婆須密八祖佛陀難是九祖伏馱密多十祖脇  
尊者十一祖富那夜奢十二祖馬鳴十三祖迦毘羅十  
四祖龍樹十五祖迦那提菩十六祖羅候羅多十七祖  
僧伽難提十八祖迦那舍多十九祖鳩摩羅多二十祖

闍夜多二十一祖婆修盤頭二十二祖摩那羅二十三祖鶴勒那二十四祖師子尊二十五祖婆舍斯多二十六祖不如密多二十七祖般若多羅二十八祖菩提達磨又曰梁武普通元年達磨來自西土為初祖以至慧能為六祖而衣鉢絕矣昔達磨以袈裟授慧可曰如來以正法眼藏付迦葉展轉至我今付汝吾滅後二百年衣止不傳遂說偈曰我本來茲土傳法救迷情一花開五葉結果自然成初祖達磨圓覺禪師姓刹利本名

菩提多羅二祖慧可大祖禪師姓盧名神光三祖僧璨

鏡智禪師四祖道信大醫禪師姓司馬五祖弘忍大滿

禪師姓周六祖慧能大鑑禪師姓盧 禪宗六祖問答

曰達磨一隻履九年冷坐無人識五葉花開徧界香二

祖一隻臂看看三尺雪令人毛骨寒三祖一罪身覓之

不可得本自無瑕類四祖一隻虎威雄鎮十方聲光動

寰宇五祖一株松不圖標鏡智且要壯家風六祖一張

碓踏著闍婆子方知有與無 唐書曰憲宗迎鳳翔法

門寺佛骨至京韓愈疏諫遂貶之

佛三

原離相 斷言

法華經曰如來生於種種之地所謂解脫相離相滅相終歸於空維摩經曰

法無名字言語斷故

慈室

慧門

法華經曰慈悲為室和柔忍辱為度佛經曰通慧為門

以法為室

龍步

鸞音

佛名經曰龍步佛新經曰鸞音佛

金乘

珠藏

佛名經曰金乘佛

又曰珠足佛珠藏佛

露山

金海

華嚴經曰甘露山佛稱揚功德經

曰大光界金海如來

寶洲

金界

佛名經曰由無寶洲佛又曰金色境界佛

日

月燈

旃檀佛

十方佛名經曰三萬億日月燈佛觀佛三昧經曰五百旃檀海佛

珠



腋

金臂

觀佛三昧經曰相佛腋下相中懸生五珠如摩尼珠上通佛腋十住論曰佛臂長過膝如

如金

字髮

輪齒

十住論曰佛髮色如墨鋒中有德字安字僧迦羅刹經曰如來齒

上有千輻輪相

七滿

八平

十住論曰佛身七處滿謂兩手兩肩兩足及頸佛地經曰佛

表裏八處平滿三峯腹齊如等色好

寶飾

珠裝

七寶之飾法顯記曰僧尼羅國王以金

等身而鑄佛像髻裝寶珠有盜者以梯取之像漸高而不及盜歎佛不救衆生像俯首而與之後市人擒盜盜

言其事視像尚俯王

即行

能飛

工詳佛二世說牟子曰漢明帝夢

重贖其珠而更裝之

神人身有日光飛上殿前明日問羣臣傳毅對曰聞天竺有得道者號曰佛輕舉能飛身有日光殆將其神也

於是

金精髮

珠火屑

大集經曰佛不以惡事加衆生故得髮色金精相璽珞經

上悟

曰佛者

琉璃咽

珊瑚舌

三昧經曰咽喉如琉璃筒  
大智論曰佛舌相色如

珊瑚

珠澤毛

金花面

離垢施女經曰賢者阿難以偈  
歎曰白毛眉間生美澤猶真珠

修道經曰佛

漢帝夢

何充佞

上詳能飛注  
充執政崇信佛供

面光如金花

給沙門靡費巨萬不吝親友貧乏無所施遺時却惜及  
弟曇奉天師道而充與弟準宗釋氏謝萬曰二郗諂於

道二句

增現足

化身

世尊入般涅槃一祖迦葉至  
雙林樹間悲戀號泣佛於金

佞於佛

棺內現出雙足按世尊如來瞿曇南無皆佛號  
有僧問風穴曰如何是佛穴曰金沙灘頭馬郎婦世言觀音

化身按馬郎嘗見美婦賣魚遂求為婦婦曰遠體不安  
少安相見未幾而死忽有僧來云此菩薩也以錫杖挑

骨凌空

蜂臺

獅座

山堂肆考蜂臺佛誦經臺也唐  
詩祀菊坐蜂臺獅子座即佛

而去

座也

鉢衣

玉鏡

唐詩鉢衣千古佛  
玉鏡道茂金輪言佛法妙也

藝文運光

慈

雲

慧日

上詳釋教四  
下詳釋教五

梵輪

福舍

唐詩花沒梵輪  
前梵輪佛鏡也

藝文效彼毘城建茲福  
舍毘城佛國毘耶城也

恒沙

法界

山堂肆考恒  
沙佛教所施

即世界也又佛法之妙境謂之玄津  
界謂佛法所施之地盡法界而虛空也

法

龍音螺

髻

工佛名山堂肆考世尊於肉髻中  
出百寶光肉髻如青螺故曰螺髻

紺馬

火龍

藝

文天琴夜下紺馬朝翔紺馬佛所乘也  
又曰如花譬象若火疑龍言佛像也

面壁坐

山

傳燈錄初祖達磨姓利利南天竺國人得般若多羅  
傳正法眼藏曰當往震旦設大法樂師遂泛重溟凡

三周寒暑達於南海寶梁普通元年也武帝詔至金陵  
問曰朕造寺寫經不可勝紀有何功德師曰並無功德

此但小果有漏之因如影隨形雖有非實師知不契潛  
回江北止於嵩山少林寺面壁九年人莫之測時魏氏  
律師流支三藏每與師議論是非蜂起竟有害心數加  
毒藥至第六度以緣化既畢傳法得人遂不復究端坐  
而逝按南詔以天子為震旦又輟耕錄以東土為震旦  
山堂肆考二祖慧可姓姬初晏坐香山八載有神人  
曰將欲受果何滯此耶翼日頭痛如刺其師欲治之  
空中曰此乃換骨非常痛也師視其骨如五峯秀出

斷臂

息緣

山堂肆考二祖慧可初名神光既事達磨  
遂與改名嘗夜大雪侍立不動念曰昔人

求道馱骨取髓刺血濟飢布髮掩泥投崖飼虎古尚如  
此我又何人遲明積雪過膝曰願和尚開甘露門廣度  
羣品遂潛取利刀斷左臂於前師知是法器遂以心印  
袈裟傳之二祖慧可初時將平生所悟舉似達磨達  
磨皆云是知見不是道汝但外息諸緣內心無喘心如  
牆壁可以入道注云八萬法門百千三昧十方世界萬

象森羅皆是外緣內心無喘謂念不起也  
二祖從此皆息諸緣心如枯木忽然大省

### 滅魔逢

蟒

山堂肆考十二祖馬鳴大士名功勝忽見女子說偈  
曰稽首長老尊當受如來記今於此地上宣通第一

義師曰將有魔來即一金龍震動山岳師儼然於坐魔  
事隨滅遂復本形曰我名迦毘摩羅化巨海極為小事  
師曰汝化性海得否曰我未嘗知師曰山河大地皆依  
建立三昧六神通由茲發現迦毘遂發信心與衆徒三  
千俱來剃度師乃付法十三祖迦毘摩羅入山逢大  
蟒盤繞師身師授三歸依蟒化為素服老人曰我昔為  
比丘有初學來請益我煩於應答起嗔恨想命終  
墮為蟒身住是石窟千載適聞戒法故來謝耳

舍

利子

法喜妻

釋氏要覽注釋迦佛既化弟子阿難等  
焚其身有骨子如五色珠光瑩堅固名

曰舍利子因造塔以藏之龍樹心經曰舍利子亦云舍  
利弗乃佛弟子名以其母眼似舍利弗鳥之眼故因其

母而立名或云舍利鳥則此間所謂鶯鳥其眼圓因以  
舍利稱其母此言舍利子若曰婦人舍利者之子也  
山堂肆考菩薩問維摩居士父母妻子眷屬是誰答曰  
智度為母方便為父法喜為妻慈悲為女善心成實為  
男畢竟空寂為舍按法喜者謂見法生歡  
喜也東坡詩曰雖無几方兄幸有法喜妻  
般若臺

兜率宮

山堂肆考清涼禪師曰夫般若者苦海之慈航  
昏衢之巨燭也昔陳文達誦金剛經有人入冥  
府見築臺云此待陳文達按梵云般若若此云智慧言人  
受起薦則能智慧也佛生於兜率天亦曰兜率宮

舍衛城

妙喜國

山堂肆考世尊凡至食時著衣持鉢入舍衛城乞食佛言有國名

妙喜維摩詰於彼國寂沒而來此生也

玉毫光

金粟影

玉毫光佛光也藝文玉毫

朗照出天人之表發迹經淨名大士是往古金粟如來

金粟影佛影也

極樂界

大願

船

佛書經言西方大受快樂無一切苦惱故名極樂世界

淨土文菩薩乘大願船住生死海就此世界呼

引衆生上大願船送至西

方如有往者無不得生

共命鳥

二首一身即迦陵頻伽鳥也

唐詩鳥聚疑聞法龍參若護禪

摩尼珠

隨坐衣

唐詩鳥聚疑聞法龍參若護禪

日摩尼珠以喻法性圓明清淨不染穢污也故唐詩唯有摩尼珠可照濁水源

梵語云尼師壇又云尼師但

那此云隨坐衣

唐言坐具也

以貝多葉書之

蓮花偈即佛語也

授袈娑

得骨髓

上詳佛二

減命門人各言所得道副曰如我所見不執文字不離文字而為道用師曰汝得吾皮尼總持曰我今一見更

不再見師曰汝得吾肉道育曰四大本空五蘊非有而

我所見無一法可得師曰汝得吾骨最後慧可禮拜依

欽定四庫全書

御定四庫全書

位而立師曰  
汝得吾髓

# 佛四

原覺悟羣生

後漢書曰浮屠者佛國也西域天竺有佛道焉佛者覺也將以覺悟羣生也

化通萬物

又曰佛身長丈六尺黃金色環珮日月光變化無常無所不入故能化通萬物而大濟羣

生

有大威德

大神力也

專務清淨

後漢書曰佛慈心為主不殺生類專務清

淨其精進者號為沙門漢言息心蓋息意去欲而歸無為也

青蓮妙相

滿月金

容

見維衛佛像銘

頰如師子

牟子曰佛生天竺假行王家父曰白淨夫人曰白淨妙四月八

日佛精從天來夫人晝寢夢見象六牙欣然悅之遂感而孕因以八日從母右脇而生太子有三十二相八十



種好類如師子皮不受塵  
水手足皆鉤鑠毛悉向上

身有日光

詳前

蓮花承步

旃檀作像

增一阿含經優填王敕國出巧匠會以牛頭旃檀作佛像供養晨夕禮拜

歸

依瞻仰道成周初

法顯記曰佛生於殷末道成於周初至成王十二年經律始到

新頭河注河即張騫所到之處

法流後漢

南史曰天竺諸國皆事佛道自後漢明帝法始東流

自此以來其道稍廣

教起西方化流中夏

漢明帝夢金人飛空而下傳教曰西

域之神其名曰佛今陛下所夢將是乎乃使郎中蔡愔等往天竺尋訪佛名由是化流中夏

相好

光明神通變化紫金之像白毫之光莊嚴具

足變化無常發菩提之心展供養之具自相

不常隨求而變

神周無朕應念而生

增梵唄

梵者

華言止斷外事蓋讚詠之聲也清而不濁雄而不猛流而不越凝而不滯遠聽則汪洋峻雅近聽則從容和肅昔曹子建游魚山忽聞空中梵天之音清響哀悅獨聽良久乃摩其節寫為梵唄此梵唄所自始也一說梵唄是趙石勒時事

法供

山堂肆考佛諸供養中唯法供養最重

七燈

藝文輪斷七燈暉燈

佛燈

三車

傳燈錄佛有三車謂羊車鹿車牛車也

七能

傳燈錄嵩神謂元珪禪師

曰我神通亞佛師曰汝神通十句五能五不能佛則十句七能三不能神悚然曰可得聞乎師曰汝能換上帝東天行而西天躍乎曰不能曰汝能奪地祇賦五岳而結四海乎曰不能曰是謂五不能佛能空一切相成萬法智而不能滅空業佛能度無量有情而不能盡衆生界佛能知羣有性而窮億劫事而不能化導無緣是謂

三不能也空業亦不牢久無緣亦謂無期衆生界本無增減

八解

山堂肆考八解沙門浴池名佛

言英妙八解心高超七花意又云七花屏塵想八解濯芳襟

莊嚴相

言佛像之光彩也

方便門

方便門佛教也藝文開方便門示真實相

香積飯

維摩居士遣八菩薩往衆香國

禮佛言願得世尊所食之餘欲以娑婆世界施作佛事於是香積如來以衆香鉢盛飯與之

伊蒲

饌

詳釋

第一機

雲門問卧童長連牀上學得是第幾機曰第二機雲門曰作麼生是第一

機童曰峭

不二門

文殊謂維摩詰曰何等是不二法門摩詰默然文殊曰善哉乃至無

繫革鞋

有文字言語是真入不二法門也

七聖財

報恩經猛火燒世間財惡口燒七聖財故口舌皆鑿

身之寶也七聖財謂一信二精進三戒四慙愧五聞捨六忍辱七定慧七者能資用成佛故名財

三

世火

僧靈一詩燈傳三世火樹老五株松三世謂去來今也三世火謂燈火常明也

遙源濬

波

文選玄關幽鏡感而遂通喻法藏也遙源濬波酌而不竭喻法海也

妙臺慧殿

藝文上微

妙之臺昇智慧之殿言佛道之至妙也

佛五

原詩齊王融訶詰四大門詩曰迅矣百齡綿茲六入出

沒昏疑興居愛習總總子求營營爾給匪德曰歸唯殃

斯集貪人敗類無厭自及昭回不希玄墟何泣 又在

家男女惡門詩曰石磨則磷玉生雖堅唯居必徙豈曰

能賢冰開春日蘭敗秋年天教斯類及習情遷命符三  
牖生偕十纏茲焉遂往憂畏方延 又大慚愧門詩曰  
蘭室改蓬心旌崖變伊草丹青有必渝絲素豈常皓曲  
轅且繩直詭木遂雕藻一貫或成山百里勸中道崇漢  
乃王臣大楚言元保勉矣德不孤至言非虛造 又努  
力門詩曰豫北二山尚有移河中一洲亦可為精誠必  
至霜塵下意氣所感金石離有子刺掌修名立王生擢  
髮美譽垂自來勤心少騫墮何不努力出憂危勝幡法

鼓繁且擊智師道衆紛以馳有常無我儼既列無明有  
縛孰能窺 又迴向門詩曰悠悠九土各異形擾擾四  
生非一情驅車策馬殉世業市文鬻義炫虛名三墨紛  
糾殊不會七儒委鬱曾未并吉凶拘忌及數術取與離  
合實縱橫朝日夕月竟何取投巖赴火空捐生咄嗟失  
道爾迴駕盼彼流水趣東瀛 增唐李白舍利佛詩曰  
金繩界寶地珍木蔭瑤池雲間妙音奏天際法蠡吹  
孟浩然臘月八日於剡縣石城寺禮拜詩曰石壁開金

像香山繞鐵圍下僧彌日見回向一心歸松柏禪庭古  
樓臺世界稀夕嵐增氣色餘照發光輝講席邀談柄泉  
堂施浴衣願承功德水從此濯塵機 明高啟寓天界  
寺詩曰雨過帝城頭香凝佛界幽果園春乳雀花殿午  
鳴鳩萬履隨鐘集千燈入鏡流禪居容旅迹不覺久淹  
留

原讚梁沈約千佛讚曰道有偕遠理無二歸寂照同是  
形相俱非千覺俯應遞扣冥機七尊緬矣感謝先違既

過已滅未來無象一剎靡停三念齊想不常不住非今

非曩賢劫雖遼脩焉如響棲林藉樹背室違家前佛後

佛跡同轉車或游堅固或蔭龍華能達斯旨可類恒沙

萃萃羣聖均此妙極先後參差各隨願力密跡弘道數

終乃陟誓覩來運永傳令識 增唐李嶠洛州昭覺寺

什迦牟尼佛金銅瑞像讚曰嘉願克成供因無乏百靈

衛善千祥護法眇眇三思悠悠萬劫永固彛器長隆寶

葉



原頌宋謝靈運無量壽佛頌曰法藏長王宮懷道出國  
城願言四十八弘誓拯羣生淨土一何妙來者皆清英  
顏年欲安寄乘化好晨征 增唐張文成滄州弓高縣  
實性寺什迦像碑頌曰太虛混沌寂寥沉默二儀既判  
三才允植地缺東南天傾西北陵遷谷轉山開水塞月  
滿則虧日盈則昃大哉正覺竟玄不測先地而極後天  
而益不滅不生無聲無色曜魄指掌乾坤胸臆聖人立  
教用形表則實相端嚴粹容岐嶷銷滅五苦削平六賊

水號連河山名檀特六度斯闡三明在即牛口西來馬  
鳴東陟玉偈光啟金言允克碣石燕郊平原趙國雀臺  
西指蜃樓東逼建此神區爰崇淨域龍圖合兆龜書應  
墨綺綴星浮金鋪電絕地神獻果天廚送食八會雲平  
三門箭直寶堂移轉神通智力飛簷振羽虹梁重翼閭  
似雲行樓如鶴息日逐塔旋天橋縱匿封外塵黃星間  
暈黑爰憑淨居剪除荆棘雁塞消氛龍樓受職銀書玉  
版鐫名記德臨雁塔之堦基對蜂臺之間域窮逸思於

圖篆放神功於鐫刻孤標九流之間獨立金臺之側惟  
令名之不朽或馳芳於百億

原銘梁沈約釋迦文佛像銘曰積智成朗積因成業能  
仁與感將吼妙法駐景上天降生右脇始出四門終超  
九劫眇求靈性曠追玄軫道雖有門跡無可朕物我兼  
謝心行同泯一去後心百非寧盡式資理悟悟以言陳  
言不自布出之者身有來必應如泥在鈞應我以形而  
余矇瞽守茲大夜焉拔斯苦仰尋靈相法言攸吐不有

尊儀愛焉誰親 簡文帝釋迦文佛像銘曰至矣調御

行備智周滿月為面青蓮在眸 又彌陀佛像銘曰玉

蓮水開銀花樹落惟聖降神拯彼沈漠 又惟衛佛像

銘曰灼灼金容巍巍滿月永彼人天常留花窟 又式

佛像銘曰影生千葉花成四柱塔象單留龕童雙舞

又迦葉佛像銘曰慧雨自垂仁風永扇照曜白毫半容

月面惡因有滅善燈無變 又釋迦文佛像銘曰心珠

可瑩智流方普永變身田長無沙鹵 梁安寺釋迦文

佛像銘曰帝為知仰皆規面象敬模螺髮式圖輪掌信

根有五覺枝云七仰福靈祇上生兜率 吳郡石像銘

曰七盤員鼓先奏盛唐之歌百味椒漿屢上東皇之曲  
於時微風送棹淑景浮波雲舒蓋而未移浪開華而不

噴 北齊邢子才文襄皇帝金像銘曰妙形難象至理

希詮形之所及理亦在焉悟茲空假勞此蓋纏式圖往  
祕用結來緣丹青並飾金玉同鑄神儀內瑩寶相外宣  
圓光照曜映被無邊靈應矜嚮感發大千鍾福疏續其

永如天歸慶怙恃壽等南山凡厥親類宜其永年誠歸  
妙覺標志上元託銘斯在曠劫方傳 增周庾信秦州  
天水郡麥積崖佛龕銘曰鎮地鬱盤基乾峻極石闌十  
上銅梁九息百仞崖橫千尋松直陰兔假道陽烏迴翼  
載輦疏山穿龕架嶺糾紛星漢迴旋光影壁累經文龕  
重佛影彫輪月殿刻鏡花堂橫鐫石壁閣鑿山梁雷乘  
法鼓樹積天香嗽泉珉谷吹塵石牀集靈真館藏仙冊  
府芝洞秋房檀林春乳水谷銀沙山樓石柱異嶺共雲

同峰別雨冀城餘俗河西舊風水聲幽咽山勢崆峒法  
雲長住慧日無窮方域芥盡不變天宮

原碑梁元帝荊州長沙寺阿育王像碑曰蓋聞璇璣玉  
衡穹昊所以紀物金版玉文淳精所以播氣何則咸秩  
社首義盡於寰中鑄鼎馮翊未窮於系表況復道冠萬  
靈理超千聖知周十地行圓四等變海成蘇移山入芥  
針鋒廣說藕絲見道惠音八種面門五色組鉢生華入  
青樓而吐曜金牀照米出紫殿而相輝纔度蓮河即處

天冠之寺始遊羅衛便居堅固之林斯蓋俯應閻浮未  
臻常樂降情誘接豈窮妄相若乃境無引汲智生淺深  
明同一體惑起十重七地初刃方稱變易三達後心因  
窮智種然俱冥四德脫屣雙林示表金棺現焚檀椁浩  
浩焉不可知已却望五津距青蓮之洞傍臨三天帶明  
月之流 劉孝儀雍州金像寺無量壽佛像碑曰昔堯  
乃則天莫能名其聖丘纔譬日無得稱其道況復欲宣  
五品將歎三法固使迦葉恥其無智龍樹羞其非辯猶



聞獻蓋長者頌以七言無學比丘陳其百句至有九輩  
性生一身補處塵洗玉池神聞金葉樹聲繁會趙簡於  
是未聞地寶焜煌周穆之所不見昔者出城石轉還林  
現疾夢樹既沈梵花獨反猶有香杖疊衣紅爪紺髮可  
得崇以妙剎顯用珍函彼彌陀感化殊攝日輪照曜月  
面從容毫散珠輝脣開異色似含微笑俱注目於瞻仰  
如出軟言咸傾耳於諦聽像復以其夕出住寺門始則  
映顯巖間猶對鷲山之禮未又徘徊閫外以救毘城之

疾空中生樹豈曰難思火內披蓮未為多有銘曰奄有

淨國寶應多祉葉產梵童花開釋子玉蓮交映銀河遞

起伊尹慙桑伯陽羞李劉勰剡縣石城寺彌勒石像

碑銘曰夫道源虛寂冥機通其感神理幽深玄德司其

契是以四海將寧先入威鳳之寶九河方導已致應龍

之書況種智圓照等覺徧知揚萬化於大千摘億形於

法界其靈起攝誘之權影現戲遊之力可勝言者哉自

優曇發華而金姿誕應娑羅變葉而塔像代興月喻論

其跡隱鏡象譬其常照律師應法似流宣化如渴揚舲  
游水馳錫禹山於是捫虛梯漢構立棧道狀奇肱之飛  
車類仙叟之懸閣體高圖範冠采虹蜺椎鑿響於霞上  
剖石灑於雲表信命世之壯觀曠代之鴻作也青艘與  
丹粟競采白金共紫銑爭輝梵王四鶴徘徊而不去帝  
釋千馬躑躅而忘歸 增唐李嶠洛州昭覺寺什迦牟  
尼佛金銅瑞像碑曰蓋聞發體凝寂離形相之區道心  
玄微同虛空之德不可以名言說不可以去來取泊矣

無繫修焉似存潛輝匿端而迹滿三界滅識掩智而行  
該萬法契存於希夷之表機動於忽恍之中談其空則  
不盡有為索其朕則復歸無物非天下之至妙其孰能  
與於此乎夫權智無方說三應物真乘寂住抱一湛然  
同天等人寧累於我淨見病示慘未虧於常樂故能蒙  
塵於八邦之路含垢於五濁之津撫神機而獨化攜弱  
喪而同歸大悲所薰其利博矣玄德所被可勝言哉及  
道隨盈虛教遷正像猶囑累於句偈尚隄防於修習是

以四依弟子深演護持之功十行法師大弘供養之事  
爪甲儻盡悉成菩提心口能存俱離煩惱法雲上際於  
兜率慧日傍臨於震旦魯人將聖神契闇托於西方漢  
主聖明靈儀夜飛於東國屈伸變化其不可思議之致  
歟皇帝以六龍乘時三獸演法窺道品於掌握接聖期  
於旦暮彈壓海際彌綸沙境赤縣為休祥之宅蒼生沐  
仁壽之賜瑤函玉檢荅宇宙之隆平寶網珠幢迎天人  
之勝福丕業以不宰成務深慈以無緣致功固已合上

帝之玄德開中天之寶藏豈徒窮數盡妙越契踰繩而  
已哉乃發願造什迦牟尼佛尊像一軀大菩薩弟子神  
王各二身方撤東山之府且模西竺之容皇嘉迺誠用  
錫休命制度廣輪之法咸順私心琢磨鎔範之資盡令  
官給於是乎百工獻技九牧輸琛瑞雀棲鑪仙人煉火  
觀祕影於龍窟得真形於鷲山三輪千輻之偉姿七滿  
八圓之珠相青毛紺髮蓮目眸容珠纓大士登護法之  
筵金杵神王夾降魔之座磬崑崙之瑤碧窮蜀道之丹

青黼黻周施莊嚴具足靈儀始畢寶飾纔終睂宇之間  
忽呈異彩圓同植壁炯若懸珠神變無象真筌隱乎密  
微感通有途妙契存乎咫尺自非聖靈合德忠孝因心  
何以發金鞍之殊祉玉臺之秘相者哉 岑勛西京千  
福寺多寶佛塔感應碑偈曰佛有妙法比象蓮花圓頓  
深入真淨無瑕惠通法界福利恒沙直至寶所俱乘大  
車於戲上士發行正勤緬想寶塔思弘勝因圓階已就  
層覆初陳乃昭帝夢福應天人輪奐斯崇為章淨域真

僧草創聖主增飾中座眈眈飛簷翼翼存臻靈感歸於  
帝力念彼後學心滯迷封昏衢未曉中道難逢常驚夜  
枕還懼真龍不有禪伯誰明大宗大海吞流崇山納壤  
教門稱頓慈力能廣功起聚沙德成合掌開佛如見法  
爲無上情塵雖雜性海無漏定養聖胎染生迷穀斷常  
起縛空色自謬蒼葛現前餘香何嗅彤彤法宇繫我向  
依事該理暢玉粹金輝慧鏡無垢慈燈照微空王可托  
本願同歸



菩薩一

原度世經曰菩薩著法冠幘道印綬觀藥王藥上二

菩薩經曰藥王藥上身長千二百由旬隨應衆生或十八丈或八尺紫金色虛空藏經曰普賢菩薩身無量無邊百千之色五十種光虛空藏菩薩身二十由旬頂上如意珠作紫金色無涯際持法門經曰勝怨菩薩

在虛空中立與流離雲覆世界雨金色之花沈水香赤真珠蓋紺琉璃蓋珊瑚蓋大方等大集經曰不空菩

薩以三昧力其地平正猶如手掌多羅樹八道間錯羅  
布其中金多羅樹白銀葉花銀樹琉璃葉花頗黎樹馬  
腦葉花馬腦樹車渠葉花車渠樹真珠葉花赤真珠樹  
黃金葉花 精進度無極經曰菩薩為魚王漁人以網  
捕羣魚則首倒植泥中拄尾舉繩衆魚得活 六度集  
經曰菩薩為鸚鵡王徒衆三千有兩鸚鵡力勢踰衆口  
銜銜以為車乘王集其上飛止遊戲 大智度論曰菩  
薩為迦頻闍羅鳥與大象獼猴友共在必鉢羅樹下住

自相問言我等不知誰應為長象言我昔見此樹在我  
腹下今大如是我應為長獼猴言曾蹲地手過樹頭我  
應為長鳥言我於鉢羅林中食此樹果子隨糞出樹  
得生以是推之我應最大象復言先生宿舊禮應供養  
即時大象背負獼猴鳥在猴上周遊而行 九色鹿經  
曰菩薩為鹿其毛九種色角如白雪 僧伽羅刹經曰  
菩薩立行有鳥巢頂上懼卵墜落及鳥未能飛終不捨  
去

菩薩二

增大藏經曰菩薩在胎母無妨礙十月滿足四月八日夫人將諸緣女遊毘尼園攀無憂樹於是樹下忽出蓮華大如車輪菩薩化從夫人右脇而生墮彼華上自行七步舉其右手作獅子吼天上天下唯我獨尊 維摩詰經曰維摩會上三十二菩薩各說不二法門文殊曰我於一切法無言無說無示無識離諸問答是為菩薩入不二法門於是文殊又問維摩仁者當說何等是菩

薩入不二法門維摩默然文殊讚曰乃至無有語言文  
字是菩薩真入不二法門 高僧傳云釋道安姓衛氏  
常山扶柳人神性聰敏形貌甚陋至鄴佛圖澄見而異  
之因事澄為師後避地南投襄陽時襄陽習鑿齒鋒辨  
天逸籠罩當時其先藉安高名早已致書通好及聞安  
至即往修造既坐稱言四海習鑿齒安曰彌天釋道安  
時人以為名咎鑿齒與謝安書云來此見釋道安故是  
遠勝非常道士恨足下不同日而見其亦每言思得一

敘孝武遣使通問并有詔曰安法師器識踰邁風韻標  
朗居道訓俗徽績兼著豈直規濟當今方乃陶津來世  
以太元十年卒羅釋在西域因聞安風謂是東方聖人  
恒遙禮之初安生而便左臂有一皮廣寸許著臂上可  
得上下之唯不得出手時人謂之為印手菩薩 又曰  
竺法護本姓支氏博覽六經游心七籍雖世務毀譽未  
嘗介抱世居燉煌死而道化周洽時人咸謂之為燉煌  
菩薩也 續玄怪記云昔延州有婦人白皙有姿貌孤

行城市年少之子悉與之遊狎昵薦枕一無所却數年而歿州人以其無家瘞於道左大歷中忽有胡僧見墓遂趺坐具敬禮焚香圍繞讚歎數日人見謂曰此淫縱女子以其無屬故瘞於此和尚何敬耶僧曰斯乃大聖慈悲喜捨世俗之欲無不徇焉此即鑠骨菩薩順緣已盡聖者云爾請衆開墓視之遍身之骨鉤結皆如鑠狀州人異之為設大齋起塔焉

菩薩三

原夢枕 飛鉢

優樓頻羅經曰昔有童子修悟世間化作女形生長者家其母夢琉璃枕有寶

蓋菩薩曰所懷子是空明菩薩 普起

三昧經曰菩薩食鉢於空中自然飛來 鶺鴒王 獅子

六度集經曰菩薩為鶺鴒王 優

樓頻羅經曰有獅子眼王菩薩 日城 星劫 造天地經曰祭

河婁國土人無有日月之光菩薩 往造日城 法華經曰星宿劫也

手花 心地 虛空藏經

曰寶手菩薩手中出無量花香璎珞 四不得經曰菩薩心地如此

增如意珠 無量

花 上詳菩薩一下詳手花注

象猴友 鸚鵡王

俱詳菩薩一

菩薩四

原三願

菩薩內戒經曰菩薩當如三願

四誓

迦葉經曰菩薩有四種畢定誓

八方



寶女經曰舍利佛菩

薩八方無所患厭

七品

樓炭經曰有七品菩薩

天子按樹

普曜經曰菩薩成道入水洗浴八

萬天子各按樹枝菩薩牽枝出

帝釋聽經

又曰菩薩降神

母胎天帝釋

梵成來聽經

增雨金色花

覆琉璃雲

俱詳菩薩一

倒

植泥中遊戲車上

俱詳菩薩一

角如白雪

詳菩薩一

骨如

金鎖

詳菩薩二

衆香鉢

詳佛四

菩薩五

原讚東晉釋慧遠曇無竭菩薩讚曰疊疊大匠道玄數

盡壁言彼大壑百川俱引涯不俟津涂不旋軫三流開源

於焉同泯 宋傅亮文殊師利菩薩讚曰在昔龍種今  
也童真業化遊方罔識厥津高會維那研微盡神發揮  
幽頤導達天人 又彌勒菩薩讚曰時無並后道不二  
司龍潛兜率按轡候時翳翳長夜懷而慕思思樂朗旦  
屬想靈期

增銘唐元黃之江寧縣瓦棺寺維摩詰畫像碑銘曰元  
氣浩浩大匠存存鉅鏞精粹折托乾坤四生有劫六趣  
無門愛流夕漲塵飛晝昏 一 巍哉世雄應期來現妙矣

居士隨緣利見大庇生靈遂荒臺殿劫塵遐邈恒沙法

遍<sup>二</sup>空牀寂寂虛室閒閒文殊奄至波旬遽還拔毛沃

海剖芥藏山地分珠柱天潤玉顏<sup>三</sup>智惠無邊威靈具

足廣延寶坐高蹈金衆振動人天津梁道俗火宅垂蔭

幽途炳燭<sup>四</sup>於赫有晉像教斯傳續事尚矣靈儀在焉

神光夕照瑞相朝圓挹如電掣皎若星懸<sup>五</sup>我皇垂拱

誕膺寶位控引四流陶鈞萬類法闡妙有靈通夢寐政

事以和物無不利<sup>六</sup>天陰南斗地擁東吳江山作固臺

壘稱都俗富英傑人多給孤莊嚴結構炳煥規模七瞻  
彼邦邑媚茲睿宰化偃一同聲馳四海冰玉常瑩松筠  
不改迺瞻道場肅焉如在八薄遊淨域永念毘耶香如  
致飯衣似持花頻容示疾啟齒降邪室懷方丈會想無  
遮九杳杳三界茫茫九有瞻仰眸容思惟受手式刊真  
石僉圖不朽盛烈鴻名天長地久

僧一

原增一阿含經曰四河入海無復河名四姓為沙門皆

稱釋種尊勝經名為芻諸經名比丘 漢明帝內傳

曰摩騰竺法蘭漢地僧之始也 高僧傳曰僧會吳地

僧之始也 四十二章經曰僧行道如牛負深泥中疲

極不敢左右顧 增一阿含經曰沙門皆草蓐為牀

四分律曰沙門以世俗法教 白衣正法念經曰沙門

不得近一切捕鳥人戲論人外道人 長阿含經曰凡

沙門衣鉢隨身譬如飛鳥 又曰沙門不畜象兵馬兵

車兵步兵 增善覺要覽云落髮後稱沙彌華言為息

慈謂安息於慈悲之地也息惡行慈也 潛確類書晉

道安禪師受具戒於佛圖澄以師莫過佛宜稱釋氏後  
增一阿含經云四姓出家但言釋子無復本姓故云四  
河入海同一鹹味四姓出家同名釋氏云 要覽云乞

士謂上於佛乞法資益慧命下於施主乞食資益色身  
又云瓶沙王呼佛弟子為上人內有德智外有勝行  
在人之上故名上人 名義古師云苾芻西天草名有  
五德體性柔軟喻出家人能折伏身語粗獷引蔓旁布

喻出家人傳法度人連綿不絕馨香遠聞喻出家人戒  
德芬馥為衆所聞能療疼痛喻出家人能斷煩惱毒害  
不背日光喻出家人常向佛日故以名僧 楞嚴經云  
十六開士悟圓通 葉和尚讚云海英岳靈誕彼開士  
謂開衆生信心也 李白詩衡岳有闡士五峰秀真骨  
闡士開士皆僧之稱也 潛確類書住者安心覺海永  
息攀緣持者任持萬行無漏無失 翻譯云沙門或云  
桑門釋師云佛法及外道凡出家者皆名沙門摩云出

家之都名也後漢書云沙門漢言息心削髮出家絕精  
洗欲而歸於無為也瑞應云息心達本源故號為沙門  
瑞應經云太子出北城門天帝復化作沙門太子曰  
何謂沙門對曰沙門之謂道舍妻子捐棄愛欲也 善  
覺要覽云梵語云僧迦唐言衆僧史畧云凡四人以上  
名僧今一人亦稱僧蓋從衆之名也亦如萬二千五百  
人為軍今一人亦稱軍也 翻譯云或和闐傳云和尚  
梵本正名鄔波遮迦傳至于闐翻為和尚傳到此土什



師翻名力生善見云和尚外國名漢言知有罪知無罪

也 又云或阿祇利寄歸傳云梵語阿遮梨耶唐言軌

範今稱闍黎訛畧菩提資糧論云阿遮梨夜隋言正行

南山鈔云能糾正弟子行故也 善住意天子經云頭

陀者抖擻貪欲嗔恚愚癡也 釋氏要覽云遊行僧為

飛錫安住僧為掛錫 又云梵語浮圖此言

唐言

聚相

梵語僧迦此言衆僧梵語招提此言方僧梵語沙門此

言勤息梵語闍黎此言軌範梵語泥梨此言喜樂梵語

泥梨迦此言無雲處梵語迦陀此言諷誦梵語毘尼此  
言律法梵語般若此言智慧梵語涅槃此言無為又言  
滅度又言常樂梵語阿毘曇此言經律論梵語修多羅  
此言經梵語優婆塞此言清信士又言僧又言德士梵  
語優婆夷此言清信女又言尼梵語須菩提此言長老  
梵語迦羅此言袈裟又名無垢衣又名忍辱鎧又名消  
瘦衣又名離塵服梵語鄔婆斯迦此言尼梵語式叉摩  
那此言學法女即今有髮尼也 無為經曰沙門有三

坐禪為上輩誦經為中輩助眾為下輩 唐會要云天

寶六載五月制僧尼令祠部給牒則僧尼給牒自唐明

皇始也 唐食貨志云肅宗鳳翔間鄭叔清議以天下

用度不充請得召人納錢給空名度僧道則空名度牒

自唐肅宗始也 事物紀原云隋文帝以沙門彥琮為

翻經館學士命僧以官自此始 唐大歷中年興善寺

胡僧不空卒賜開府儀同三司司空謚曰大辯正廣智

不空三藏和尚 弘明集元魏封法果輔國宜城子加

忠信侯封安國公 唐武后以僧懷義為新平道大總管討突厥以僧統兵僅見於此

僧二

原事物紀原曰後漢明帝遣蔡愔等天竺訪僧見摩騰乃要還漢地此中國有僧之始也 史畧曰明帝聽陽城侯劉峻等出家此又中國人為僧之始也 晉書曰鳩摩羅什天竺人也世為國相父鳩摩羅炎聰懿有大節將嗣相位乃辭出家東度蔥嶺龜茲王聞其名郊迎

之請為國師王有妹年十二才悟明敏諸國交聘並不  
許及見炎心欲當之乃逼以妻焉既而羅什在胎其母  
慧解倍常及年七歲母遂與俱出家羅什從師受經日  
誦千偈義亦自通年十二其母攜到沙勒國王甚重之  
遂停沙勒一年博覽五經為性率達不拘小檢專以大  
乘為化諸學者共師焉年二十龜茲王迎之還國廣說  
諸經四遠學徒莫之敢抗西域諸國咸伏羅什神雋苻  
堅聞之乃遣吕光率兵伐龜茲謂光曰若獲羅什即馳

驛送之光還至涼州聞苻堅爲姚萇所害於是竊號河  
右羅什在涼州積年姚興破呂隆乃迎羅什待以國師  
之禮嘗講經於草堂寺下忽下高座謂興曰有二小兒  
登吾肩欲障須婦人興召宮女進之一交而生二子焉  
通鑑晉成帝紀曰趙王石勒以天竺僧佛圖澄預言  
成敗數有驗敬事之及虎即位奉之尤謹衣以綾錦乘  
以雕輦朝會之日太子諸公五日一朝國人化之率多  
事佛澄之所在無敢向其方面涕唾者爭造寺廟削髮

出家 高僧傳曰帛尸黎密多羅此云吉支西域人呼  
為高座傳云國王之子當承繼世而以國讓弟遂為沙  
門密天姿高朗風神超邁晉永嘉初始到中國值亂仍  
過江止建初寺丞相王導一見而奇之以為吾之徒也  
密常在石子崗東行頭陀既卒因葬於此成帝懷其風  
為樹刹冢後有闕右沙門來遊乃於冢處起寺陳郡謝  
混贊成其業追旌往事仍曰高座寺也 梁書曰沙門  
釋寶誌不知何許人於宋泰始中見之出入鍾山往來

都邑年已五六十矣宋齊之交稍顯靈迹被髮徒跣語默不倫或被錦袍飲啖同於凡俗恒以銅鏡剪刀鑷屬拄杖負之好為懺記所謂誌公符是也天監十二年卒將死忽移寺金剛像出置戶外語人云菩薩當去旬日無疾而終先是琅邪王筠至莊嚴寺寶誌遇之與交言歡飲至亡勅令筠為碑蓋先覺也洛陽迦藍記曰沙門寶公不知何許人也形貌寢陋心識通達過去未來預覩三世發言似懺不可得解事過之後始驗其實胡



太后問以世事實公曰把粟與雞喚朱時人莫解其義  
后為余朱榮所害始驗其言 梁書云誌公欲堅武帝

心請出因持杯水驗之帝如其言召應死囚二十輩各  
置水滿器令戴之周行於庭戒曰水不溢貸爾死於是  
作樂譁之久之杯水如故問之若聞樂作乎皆曰不聞  
誌公曰彼畏死故惟知水不知樂也求道亦當爾莫待  
急時陛下力猛心堅必破死生 唐高僧傳曰三藏法  
師玄奘陳留人姓陳氏貞觀初肇自咸京誓往西國窮

覽聖迹經六載至摩伽陁城凡十二年備歷聖君龍庭  
之文驚嶺之祕皆研機覩興矣又造迦葉結集之墟千  
聖道成之樹虔心頂禮焚香散花設大施會於是五天  
億衆十八國王獻羶投珠積如山岳咸稱法師為大乘  
也及東歸太宗詔留於弘福道場乃詔名德僧靈潤等  
三十人譯梵自菩薩戒至摩訶般若總七十四部一千  
三百餘軸法師身長八尺睂目疎朗凡所遊歷一百二  
十八國唐書曰李翱為朗州刺史問惟儼禪師如何

是道師云雲在水在餅翺作偈曰鍊得身形似鶴形  
千株松下兩函經我來問道無餘話雲在青天水在餅  
酉陽南部談賓錄曰僧萬迴年二十餘貌癡不語其  
兄戍遼陽久絕音問或傳其死其家為作齋萬迴急卷  
餅茹大言曰兄在我將饋之出門如飛馬馳不及及暮  
而還得其兄書緘封猶濕弘農抵安西蓋萬餘里以其  
萬里而回故號萬回先是玄奘法師向佛國取經見佛  
龕題柱曰菩薩萬回謫向閩鄉地教化矣奘師馳驛至

閩鄉問此有萬回師無令呼之萬回至樊師禮之施三

衣餅鉢而去 宋高僧傳曰禪月大師貫休以詩謁吳

越王錢鏐有滿堂花醉三千客一劒霜寒十四州之語

鏐令改作四十州乃可相見休曰州亦難添詩亦難改

孤雲野鶴何天而不可飛遂入蜀以詩投王建曰一餅

一鉢垂垂老萬水千山得得來建遇之甚厚常呼為得

得和尚 明泳化類編曰板的達天竺中印度僧也元

至正甲辰至燕受灌頂戒洪武甲寅至金陵召見稱旨

賜印號善世禪師居蔣山統制天下諸山仍移文各郡  
許詣蔣山受菩薩法戒所司勿禁人多繪像事之以為  
活佛御製善世歌有談天般若生蓮花之句尋遊方三  
年復還蔣山賜金環茜衣車駕臨幸必造其室咨問法  
要屢賦詩篇有曰晨向巖前觀日出暮禪松底聽風來  
蓋規之也死無他異葬天禧寺而屋之又曰來復字  
見心豫章人以人才仕元主學士因亂削髮為僧初髯  
甚長後為僧而髯如故所與遊皆名士胸次清灑溢為

詩章時僧宗泐著稱復與之齊名太祖嘗誦其所為詩  
文嗟賞久之因蜀王與復善講論著作以故得達太祖  
一日召問曰汝不欲仕我而去出家為僧吾亦聽汝然  
留鬚亦有說乎對曰削髮除煩惱留鬚表丈夫太祖笑  
而遣之又一日召見賜之饌既罷復上詩稱謝詩云祇  
園風雨曉吹香手挽袈裟近玉牀闕下彩雲生雉尾座  
中金第動龍光金盤蘇合來殊域玉盃醍醐出上方稠  
疊濫承天上賜自慚無德誦陶唐太祖覽詩大怒曰汝

詩用殊字是謂我為歹朱耶又言無德誦陶唐謂朕無德則雖欲以陶唐誦我而不能耶何物奸僧敢大膽如此遂殺之初復被徵其師訢笑隱止之曰上苑亦無頻婆果且留殘命吃酸梨復不聽及臨刑而悔因道訢語上聞逮訢至將殺之訢曰此故偈臣偶言非有他也上問訢何出訢曰出大藏某錄某函檢視果然乃釋之

又曰宗泐浙江台州人應天府志稱泐季潭是也性頗聰慧凡經書一目輒能誦尤博涉古今善屬文住持京

師天界寺太祖嘗幸寺見泐動止異常因令其蓄髮欲  
官之泐固辭尋奉詔注心經金剛楞伽三經馬后崩葬  
之日會風雨電震上甚不樂忽召泐至謂之曰皇后將  
就葬汝其宜為偈泐應聲曰雨落天垂淚雷鳴地舉哀  
西方諸佛子同送馬如來上悅頃之大霽遂啟輅詔賜  
泐白金百兩有金室集行於世 又曰金碧峰宣州一  
異僧也姓石氏六歲依雲寂溫法師為弟子遊峨眉山  
絕粒啖柏嘗趺坐大樹下溪水泛溢人疑已死越七日



水退趺坐如故比歸卽州治西草堂靜息焉太祖渡江  
偶一元臣迎謂曰今欲霸我將財貨納贐太祖叱曰我  
本順天應人行王道汝敢霸視我耶元臣曰若篤行王  
道可尋宣州僧金碧峰必有所授太祖抵宣州遂訪之  
乃一老僧趺坐太祖仗劒就前問姓名不對因按劒視  
之僧亦引頸就馬上笑曰可見殺人王道乎僧曰可見  
不怕死和尚耶因相語遂洽僧乃曰而欲行王道我有  
所授太祖推誠溫詢僧曰建康有地可王此真帝王之

居遂定鼎焉 又曰永隆蘇州人異僧也時洪武二十

五年太祖頒度僧之令冒請者遂至三千餘人上怒命

錦衣衛悉戮之隆上言願焚身代諸僧請死詔許之勅

中官以武士衛其龕至雨花臺隆從容出龕望闕叩辭

遂入龕書偈一首又取香一瓣書風調雨順四字於其

上謂中官曰煩奏陛下過早以此香祈雨必驗遂秉炬

自焚體不倒異香逼人羣鶴舞於龕頂上中官復命太

祖乃宥衆僧會歲大旱命以所遺香下於天禧寺禱雨

至夜果大霑上曰此真永隆雨也御製落魄僧傳以弔之

### 僧三

原六法 五門

成實論曰如說比丘成就六法能以口風吹散雪山 高僧傳曰僧督得禪法

要遂精

拘鄰

平叔

增一阿含經曰將養聖衆不失威儀即阿若拘鄰比丘 高僧

練五門

傳曰廬山隱士劉遺民見僧肇般

離日

彌天

增一阿含

若無智論曰不意方今復有平叔

經曰坐禪入定心不錯亂即

鵬者

鷹俊

增一阿含經曰言論

離日比丘

下詳菩薩二

辨了而無疑滯又能造偈誦歎如來德即謂鵬者舍比丘 高僧傳曰支遁嘗養一鷹人問何以答曰賞其神

俊卿復  
畜耳

松柏

梧桐

高僧傳曰姚興問司徒姚嵩僧  
睿如何答曰實鄴衛之松柏

又曰惠紹將於東石室自焚臨終謂同學  
曰吾燒身處當生梧桐其後三日果生焉

三輩

四

道

上詳僧一  
道果僧菩薩僧佛應化僧聖應化僧

放鶴

馴虎

有遺支道林鶴者道林謂鶴曰爾冲天之物寧為耳  
目之翫者乎遂放之高僧傳云惠永感虎來馴

賦詩

制論

惠林善屬文作碧雲之什洛陽伽藍記  
曰僧肇法師制四論合為一卷曾呈廬山

遠大師而大師  
歎仰不已云云

食針

哭杖

羅什不拘細行諸僧故  
多效之什乃聚針盈掬

食之諸僧盡皆愧服晉書曰沙門曇霍禿髮傳檀時  
從河南來持一錫杖令人跪曰此是般若眼奉之可以  
得道人或藏其錫杖霍大哭數聲閉目須臾起而  
取之咸奇其神異莫能測也後兵亂不知所在度

蟒

伏獅

高僧傳曰安清宇世高安息國王太子出家修道多有神通有一同學值施主不稱每輒

懟恨高與辭訣云命過當受惡形我得道必相度靈帝末振錫江南達邾亭湖廟廟神降以告高曰昔吾以瞋恚故墮此神報此身滅後恐墮地獄吾有絹千匹并雜寶物可以立法營塔使生善處高曰故來相度何不出形神從牀後出頭乃是大蟒高向之梵語蟒悲淚如雨乃取廟物達豫章為造東寺後暮有少年跪高受呪高曰廟神得離惡形矣又曰釋法顯姓龔氏平陽武陽人三歲便度為沙彌及受大戒以晉隆安三年西度流沙將至天竺去王舍城三十里有一寺逼暝過之顯欲詣耆闍崛山寺僧諫曰路甚難阻多黑獅子亟經噉人何由可至顯曰遠涉數萬里誓到靈鷲雖有險難吾不懼也既至山日將曛夕遂留山中燒香禮拜如覩聖儀有三黑獅子來蹲踞顯前舐唇搖尾顯誦經不輟獅子乃低頭下尾伏顯足前顯以手摩之獅子良久乃去

乘杯振錫

高僧傳曰杯度者不知其姓名常乘木杯渡河因名焉不修細行不甚精持飲

酒食肉與俗人不異也

又曰康僧會其先康居人吳地初染大法風化未全僧會欲使道振江左乃振錫東

遊以吳亦烏十年初達建

業營立茆茨設像行道

支許

岩議

支遁字道林講維摩經通

為法師許詢為都講通議衆謂無以歷難詢設一難亦

謂適不能復通也梁書曰有患岩患議道人并住東

安寺學行精整為道俗所推

花氏城

杯度鉢

法藏傳曰

都下謂之語曰東安談議林

馬鳴比丘於花氏城中與五百王子同時悟道

高僧

傳曰朱靈期使高麗還值風飄至一洲見一寺有石人

靈期竭誠懺悔乃為真人因以鉢與杯度度得

仙人

鉢直入雲還接之云我不見此鉢乃四千年矣

星咒龍雨

高僧傳曰道開從西而來日行七百里太史奏石虎云有仙人星見當有高士入境

又曰沙公荷堅時旱  
咒龍下鉢中天即大雨

呪鉢生蓮

踰石大水

佛圖澄妙

通玄術腹旁有孔當齋時至流水側引五藏洗之還內  
腹中取鉢臨水燒香咒之生青蓮花高僧傳云訶羅  
竭者多衍頭陀晉惠元康四年西入婁至山石室坐禪  
去水遠乃以左腳踰室西石辟蹈沒指既拔足水從中  
出清香軟美四時不竭  
來飲者止飢渴除病

革囊見試

穢尸敢行

高僧  
鬼戒

行嚴潔嘗有一女子寄宿自稱天女以上人有德天遣  
我來勸勉其意鬼執意貞確一心無擾曰吾心若死灰  
無以革囊見試女乃凌雲而逝顧曰海水可生須彌可  
傾彼上人者秉心堅貞續高僧傳釋慧恭益州成都  
人與同寺慧遠結契遠詣長安恭往荆揚訪遠相遇欣  
然同宿遠言談泉湧恭竟無所道遠問恭恭曰唯誦得  
觀世音經一卷遠怪之恭曰經表雖小尊敬者得無量  
福願息瞋心當為法師誦一遍乃結壇昇座恭發聲唱

經題異香遍滿房宇及入經文天工作樂嘹亮振空雨  
花霏霏滿地誦訖下座花樂方散遠頓足頂禮淚下交  
流謝曰慧遠見穢死尸敢行天  
日之下恭長揖而去不知所之  
臭泥蓮花 黑衣宰

相上詳佛二 宋沙門慧琳秦郡秦縣人姓劉氏少出  
家治城寺有才華兼內外之學嘗著均善論行於世

文帝見論賞之元嘉中遂參權要倖於宰相會稽  
孔愷詣之歎曰遂有黑衣宰相可謂冠履失所矣 枯

樹生枝 飛鳥投果 洛陽伽藍記云法雲寺西域烏菴  
國胡沙門曇摩羅所立摩羅聰慧

學窮釋氏至中國即曉魏言及隸書凡所聞見無不通  
解戒行真苦祕咒神驗咒枯樹能生枝葉咒人變為驢  
馬見者無不驚怖西域所齋舍利骨及佛牙經像皆在  
此寺 高僧傳云天竺沙門智伽達禪學深明來遊宋  
境學在中坐禪日時將迫念欲虛  
齋乃有羣鳥銜果飛來投之云云  
增碧眼 白足 達磨



眼紺青色稱碧眼胡僧 高僧傳云釋曇如遊化闍  
中足白於面雖跣涉泥水未嘗沾汚時稱白足和尚

赤髭

白眼

上詳僧四  
長黑瘦兩眼多白而睛黃時人語曰支郎

魏高僧傳支謙博覽經籍細

眼中黃形軀

雖細是智囊

飛錫

雨花

潛確類書舒州潛山最奇  
而山麓尤勝誌公與白鶴

道人同謀於梁武帝俾各以物誌其地者得之已而鶴  
先飛去至麓將至忽聞空中飛錫聲誌公之錫遂卓於  
山麓遂各以所識築室焉 大洞坊雲花寺大歷  
初僧嚴講經天雨花至地咫尺而滅夜有光燭室

點

石

吐霧

潛確類書梁高僧生公講經於虎丘寺聚石  
為徒與談至理石皆點頭 元豐間久旱裕

陵齋禱甚力一夕夢有僧乘馬馳空中口吐雲霧既覺  
兩大作速旦物色至相國寺羅漢中第十三尊正所夢  
也

食鳩

騎馬

潛確類書鄧州和尚日食二鳩有貧  
士求餐分二足與食食訖僧盥漱雙

鳩從口出一能行一匍匐在地士驚愕亦吐飯二足亦  
出因號食鳩和尚山堂肆考宋禪惠大師雅州名山  
人屢舉不第元符間郡守呂由誠以僧勅戲之師即削  
髮為僧或叩以佛法不許乘馬師即曰文殊駕獅子普  
賢跨象王新來一個佛騎

隋雁

聞鴉

西域有比丘見羣雁飛乃

馬也何妨其機敏如此

曰可充我食一雁即墮地佛曰此雁王也不可食因立

雁塔傳燈錄云益州無住禪師嘗務宴寂於是庭樹

鴉鳴杜鴻漸問師聞否曰聞鴉去又問師聞否曰聞鴻

漸曰鴉去無聲何師言聞曰聞非有聞非聞聞性本來

不生何曾有滅有聲之時是聲塵自生無聲之時是聲

塵自滅而此之聞性不隨聲生不隨聲滅悟此聞性即

免聲塵

弄獅

喚虎

山堂肆考藥山禪師問雲巖聞汝解弄獅子是否曰是弄得幾

所縛

出巖曰弄得六出藥山曰我亦弄得一出巖後到滿山

滿山問長老在藥山弄獅子是否雲巖曰是曰長弄得否

還有置時雲巖曰要弄即弄要置即置 潭州華林善  
覺禪師時觀察使裴休訪之問有侍者否師曰有兩個  
乃喚大空小空二虎自庵後出師曰有客且去二虎咆  
哮而去休問作何行業感得如斯師曰山僧嘗念觀音  
經

### 巢鵲 名魚

山堂肆考杭州道林禪師姓吳名元  
卿初至秦望山見長松枝葉蟠屈如

蓋遂棲其上復有鵲巢其側人目為鳥窠和尚 蜀普  
錄東川解魔寺僧吉祥魁悟多力受飯五鉢日夜誦經  
五函池中魚知其數  
以名召之皆出水面  
金舌 布毛 唐金舌和尚趙人  
文宗開成間三召

不至乃截其舌以進上即命焚之乃為金舌夜哦經如  
故遂以金舌名之 傳燈錄云道林禪師有侍者辭去

師曰何往曰往諸方學佛法師曰若是佛法此中亦有  
少許於身上拈起布毛吹之其人遂悟時謂布毛侍者

### 遊莊 投海

山堂肆考南泉普願禪師姓王擬取明  
日遊莊其夜土地神先報莊主莊主乃

預為備師到問莊主爭知老僧來莊主云昨夜土地神報師來師曰王老修行無刀却被鬼神覩見淨真華亭人宋嘉定間為興聖寺僧有道行嘉熙間浙江錢塘江坍真作偈呈趙端明遂以身投海三日而還謂衆曰我在龍宮說法龍神聽受此江不復崩矣語訖復入於海安撫工其事勅賜護國真法寺

### 玉帶

草屨

山堂肆考佛印禪師法名了元饒州人東坡與之遊時住潤州金山寺東坡赴杭過潤為留數日一

日值師掛牌與弟子入室公使服入方丈見之師曰內翰何來此間無坐處公戲曰借和尚四大作禪牀師曰山僧有一轉語內翰言下即答尚從所請不然願留所繫玉帶以鎮山門公許之便解帶置几上師云山僧四大本空五蘊非有內翰欲於何處坐公擬議未即答師即呼侍者云收此玉帶永鎮山門公笑而與之師遂取衲裙相報昔有一住山僧或謀攘之僧乃掛草屨一雙於方丈前題詩云方丈前頭掛草屨流行坎止任安

排老僧脚底從來闊  
未必枯體就此理

# 蓮社虎溪

高僧傳云晉義熙間僧惠遠居廬山

與劉遺民等十八賢同修淨土中有白蓮池因號蓮社  
以書招陶淵明淵明曰若許飲酒即往即許之遂造馬  
既而無酒陶攢眉而去謝靈運求入社遠師以其心雜  
止之廬山記云惠遠居廬山東林寺送客不過溪一  
日與陶淵明道士陸修靜共話不覺踰之虎輒驟鳴  
三人大笑而別後建三笑亭內有小渠名曰虎溪

# 破竈

## 方袍

潛確類書岳山廟有一竈甚靈祭享甚衆  
隋和尚以杖擊之三下云咄只是泥土合

成聖從何來竈乃隋落須臾一青衣人拜師曰我是竈  
神久受業報蒙說無生得脫此處特來相謝因號破竈  
和尚僧寶傳泉州龜洋慧忠禪師屬唐武宗廢教例  
為白衣作偈云多年塵事漫騰騰雖著方袍未是僧今  
日修行依善慧滿  
額珠心鏡  
彙苑云額珠內隱匪  
頭留髮待然燈  
指莫妙文粹云心

鏡外塵匪  
磨莫照

伊蒲供 水田衣

上詳佛四 王右丞詩  
乞食從香積裁衣學水

田按水田衣稻  
畦帔即袈裟也

無垢衣 忍辱鎧 消瘦衣 離塵

服 俱袈  
裟名

雪過腰 香還頂

上詳佛三 華夷考云僧  
迦者西域人唐時居京師

之薦福寺嘗獨處一室其頂上有一穴恒以絮室之夜  
則去絮香從頂穴中出煙氣滿房非常霏霏及曉香還  
頂上仍以  
絮室之

即色論 剃頭書

世說支道林作即色論  
畧曰夫色云性也不自

有色色不自有雖色而空故曰色即為空色復異空  
山堂肆考人勸劉淨翁捨俗出家黃山谷詩云淨名龐  
老總垂鬚君宰元無免破除身若  
出家心若住何須更覓剃頭書

雲霞思 水月心

唐詩云雲霞思獨元謂禪思也  
又云水月心方寂水月心禪心也

# 僧四

原密行

淨名

利根

辨性

執惠炬

涅槃經云

知劫灰

高僧傳云

竺法蘭天竺人漢武穿昆明池底得黑灰問東方朔朔云不知可問西域胡僧法蘭至問之蘭云世界終盡劫火洞燒此

度人格

祠部格王公已下薨別敕許度人者親王二十三品已上三人並須

亡者子孫及妻勝并通取周親妻勝不須世業若數不足唯見在度如有假冒不在原首之限

出家

格

又云私家部曲客奴婢等不得入道如別勅許出家後犯還俗者追歸舊主各依本色

赤髭

三藏

洛陽伽藍記云佛耶舍此名覺明日誦三萬言洞明三藏為人髭亦時號亦髭三藏

連眉

禪師

高僧傳云法秀蜀賓人也蜀賓多聖達屢值明師博貫羣經特深禪法為人沈邃有慧解儀範詳正

生而連着故世號  
連着禪師云云

生融之學 觀摩之名

高僧傳云  
通情則生

融上首精難則觀摩第一按竺道  
生融覽惠觀摩法師四僧名也

長老 高僧 上

人 開士 善根 福地 法器 道心 梵行 覺

性 修行 宴坐 聽法 觀心 演法有緣 遊方

無住 脫畧塵境 歸依法門 五蘊皆空 諸漏已

盡 謂六  
根也 觀身色頓悟無生之理 處世界當持不染

之心 身則有為所以歸於三寶 心實無相俾乎宗

本一乘 虛幻非實身喻芭蕉之形 明徹無瑕心學



琉璃之地

增宿桑

漢襄楷曰浮屠不三宿桑下

摩

松

山堂肆考主熒法師貞觀初往西域取經手摩靈巖寺松曰吾西去汝可西向若歸則東向使弟子知之

及去其枝年年西向忽一年東向弟子

傳燈

山堂肆考僧以

曰吾師歸矣果然因號松曰摩頂松

法傳度小師曰傳

刻漏

國史補云僧慧遠在廬山以山中不知更漏乃取銅葉製

燈謂能破暗也

器狀如蓮花置水盆上底孔漏水半

賜紫

山堂肆考唐武后以

之則沉每晝夜十二沉為行道之節

僧法朗譯大雲經命賜紫袈

賜黃

又曰僧舊著黑衣元文宗寵愛僧訢

策則僧之賜紫自天后始也

笑隱賜以黃衣其徒後皆衣黃歐陽元功題僧墨菊詩

苾芻元是黑衣郎當代深仁始賜黃今日黃花翻潑墨

本來面目

投簪

廬山記投簪落髮委命受業

留鬚

詳僧二

買山

見馨香

而隱

世說支道林就深公買印山深公曰未聞巢由買山而隱

叩冰而浴

山堂肆考叩冰

和尚崇安人名藻光出家參雪峯真覺禪師住瑞巖院前有溪過冬則叩冰而浴

嘗水卜地

又曰梁天監元年有天竺僧智藥自西土來泛舶至漢上尋至韶州曹溪水口聞其香樹嘗其味曰此水上流有勝地尋之遂開山立石寶林乃云此去百七十年當有無上法寶在此演法今六祖南華是也

問

山結庵

又曰龍湖禪師名普聞唐僖宗第三子往湖南石霜寺參禪及去囑之曰汝逢乾即止逢陳即

住至邵武問其山曰大乾問居者曰有一道士姓陳師怡遂結庵焉

借宿道者

潛確類書黃梅

東山一道者參四祖云汝老矣道者退見一女子洗衣問曰借你家宿肯麼女曰家有父母肯留汝則宿道者行不遠於大樹下坐脫自是女子有孕生一男竟傳法嗣

錦襦婦人

袁郊甘澤謠曰沙門圓澤

與隱士李源同遊我者舟次南浦見婦人錦襦負罌而  
汲澤曰所不欲由此者為是也此婦人孕三年矣遲吾  
為子今已見之無可逃者三日浴兒願公臨顧以一笑  
為信後十三年當於杭州天竺相見至暮果亡婦乳一  
日源往視之兒見源即軒渠而笑李後如期至杭忽聞  
葛洪井畔有牧童隔水呼源乃澤也歌曰三生石上舊  
精魂賞月吟風莫要論慙愧情人遠相訪此身雖異性  
常存歌畢舞袖而去

### 翠竹黃花

傳燈

錄云迷人不知此身無象應物現形遂喚青青翠竹總  
是法身鬱鬱黃花無非般若黃花若是般若般若即同  
無情翠竹若是法身法身即同草木如此之言寧堪齒錄  
寒灰死火

古禪師曰無心即是道若

得無心輪迴永斷但學休心如癡如愚似胞胎中出來  
第一莫記一個字在心一向如寒灰死火枯木石頭又

似一個無孔鐵椎始得

### 山中老宿

東坡詩云山中老宿依然  
在案上楞嚴已不看

### 竿

頭進步

傳燈錄曰百尺竿頭須進步十方世界是全身

僧五

原詩宋謝靈運過瞿谿石室飯僧詩曰清霄颺浮煙空  
林響法鼓庶乘四等觀永拔三界苦 隋江總經始興  
廣果寺題愷法師山房詩曰息舟候香埠悵別在寒林  
竹近交枝亂山長絕逕深輕飛入定影落照有疎陰不  
見投雲狀空流折桂心 增唐韋應物詣西山深師詩  
曰曹溪舊弟子何緣住此山世有征戰事心將流水閑

埽林驅虎出宴坐一林間  
沈佺期九真山靜居寺謁  
無礙上人詩曰大士生天竺分身化日南人中出煩惱  
山下即伽藍小澗香為刹危峰石作龕候禪青鵠乳窺  
講白猿叅藤愛雲間壁花憐石下潭泉行幽供好林掛  
浴衣堪弟子哀無識醫王惜未談機疑聞不二蒙昧即  
朝三欲究因緣理聊寬放棄慙超然虎溪夕雙樹下虛  
嵐劉禹錫謁枉山會禪師詩曰我本山東人平生多  
感慨弱冠遊咸京上書金馬外結交當世賢馳聲溢四

塞勉修貴及早徂健不知退錙銖揚芬馨尋尺招瑕類  
淹留郢南都推顏羽翰碎安能咎往事且欲去沈疴吾  
師得真如寄在人寰內哀我墮名網有如翺飛輩瞳瞳  
揭智燭照使出昏昧靜見玄關啟歆然初心會夙尚一  
何微今得信可大覺路明證入便門通懺悔悟理言自  
忘處屯道猶秦色身豈吾寶慧性非形礙思此靈山期  
未卜何年載 孟郊夏日謁智遠禪師詩曰吾師當幾  
祖說法雲無空禪心三界外宴坐天地中院靜鬼神去

身與草木同因知護王國滿鉢盛毒龍抖擻塵埃衣謁  
師見真宗何必千萬劫瞬息去樊籠盛夏火為日一堂  
十月風不得為弟子名姓掛儒宮 杜甫謁真諦寺禪

師詩曰蘭若山高處煙霞障幾重凍泉依細石晴雪落  
長松問法看詩妄觀身向酒慵未能割妻子卜宅向前  
峰 王維夏日過青龍寺謁操禪師詩曰龍鍾一老翁  
徐步謁禪宮欲問義心義迷知空病空山河天眼裏世  
界法身中莫怪銷炎熱能生天地風 裴迪夏日過青

龍寺謁操禪師詩曰安禪一室內左右竹亭幽有法知

不染無言誰敢酬鳥飛爭向夕蟬噪已先秋煩暑自茲

適清凉何所求 李端夜投豐德寺謁海上人詩曰半

夜中峰有磬聲偶尋樵者問山名上方月曉聞僧語下

界林疎見客行野鶴巢邊松最老毒龍潛處水偏清願

得遠公知姓字焚香洗鉢過餘生 陸龜蒙寒夜同襲

美訪北禪院寂上人詩曰月樓風殿靜沉沉披拂霜華

訪道林鳥在寒枝棲影動人依古堞坐禪深明時尚阻



青雲步半夜猶追白石吟自是海邊鷗伴侶不勞金偈  
更降心 皮日休奉和訪寂上人詩曰院寒青靄正沉

沉霜棧乾鳴入古林數葉貝書松火暗一聲金磬擡煙  
深陶潛見社無妨醉殷浩譚經不廢吟何事欲攀塵外  
契除君皆有利名心 僧貫休逢詩僧詩曰禪玄無可

示詩妙有何評五七字中苦百千年後清難求方至理  
不朽始為名珍重重相見忘機話此情 白居易喜照  
密閑實四上人見過詩曰紫衫朝士白髯翁與俗乘疎

與道通官秩三迴分洛下交遊一半在僧中臭帑世界  
終須出香火因緣久願同齋後將何充供養西軒泉石  
北窗風 宋黃公度和泉上人詩曰芒鞋踏遍萬山松  
得得歸來丈室中破衲一身若懸磬清談對客似撞鐘  
名家要看驚人舉覓句何須效我窮春雨地爐分半坐  
便疑身住古禪叢 陸遊宿東林寺詩曰看盡江湖千  
萬峰不嫌雲夢芥吾胸戲招西塞山前月來聽東林寺  
裏鐘遠客豈知今再到老僧猶記昔相逢虛窗熟睡誰

驚覺野碓無人夜自春 元郭奎留水雲寺貽季潭上

人詩曰好山吾所慕今日水西遊花雨千峰暝松風六月秋龍為人聽法僧共鹿尋幽如此林泉樂榮名安足求 黃鎮成寄雷隱上人詩曰最憶高人住翠微萬巖

千岫雪消時林階月在行香早石屋雲多出定遲栖樹有僧留聽法看泉無客和題詩松闌不鎖容相叩定覓春山食紫芝 白雲上人重遊淨慈憶沆禪師詩曰慧日峰前閣重來百感增空存黃面老不見白頭僧道偈

書猶在埋銘刻未曾有詩行已久何必上傳燈 僧善

住寄巖栖翁詩曰霜髭碧眼老頭陀陋巷曾經幾度過  
連月不來城裏住只緣城外好山多 明高啟送思上

人詩曰名林雖盡廢南去只隨緣野飯晨留鉢城鐘夜  
到船虎馴應畏法鳥喚不驚禪他日期相見高峰舊塔  
前 童珮觀音巖贈僧詩曰問道祝融東相逢是遠公  
林間孤殿破石下半潭空雲影戀苔綠山光借樹紅翻  
經對靈鷲日日鳥聲中

原詔後魏孝文帝立僧尼制詔曰門下凝覺澄沖事超俗外揣摩苑蹟理寄忘言然非言何以釋教非俗何能表真是三藏舒風必資戒典六度摘花固憑尸波自象教東流千齡以半秦漢俗革禁制彌密故前代英人隨宜興引時輕時重以闡玄奧與先朝之日嘗為僧禁小有未詳宜其修立近見沙門統僧顯等自云欲更一刊定朕聊以淺識共詳正典事起忽忽觸未詳究且可設法一時粗救俗習須玄白一同更釐厥喪 宋孝武帝沙

汰沙門詔曰門下佛法訛替沙門混雜未足扶濟鴻教而專成逋藪加頃奸心頻發凶狀屢聞欺道亂俗人神交忿可付所在與寺耆長精加沙汰後違犯嚴其誅坐主者詳具條格速施行

原碑梁元帝莊嚴寺僧旻法師碑曰夫宏才妙物雲液之所降生獨振孤標倫類之所遠絕是故隨光燭魏非折水之恒珍和璧入秦豈潤山之常寶僧旻法師蓋天地之淳精宇宙之瓌器本姓孫氏有吳開國大皇帝其

先也法師道藹二儀德充四海含春夏之生長抱日月  
之貞明辭旨清新置言閑遠千門萬戶必臻其奧九部  
五時若指諸掌坦然夷易豁爾洞開故縑素結轍華戎  
延道晨風之鬱北林龍魚之趣深澤哲人云逝指南誰  
屬銘曰永離百非聞之寂滅苟云未樹共歸今轍方墳  
結構伽藍罷設朱火一潛青松長列 又光宅寺大僧  
正法師碑曰昂昂千里孰辨麒麟之蹤汪汪萬頃誰識  
波瀾之際望之若披雲霧觀之如觀日月至乃耆年宿

望蓄思構疑懸鍾無盡短兵有倦猶若分旦望景履冰  
待日莫不傾河注燭虛往實歸皇帝革命受圖補天紂  
地轉金輪於忍土策紺馬於閭浮逸翮方超圖南輟軌  
豈直盡茲相府署彼義年方當高步仙階永編金牒繁  
霜凝而旦委松風淒而暮來悲馬鳴之不反望龍樹而  
心哀銘曰澄月夜虧清氣旦卷曾巒遠岸蒼江傍緬  
王筠國師草堂寺智者約法師碑曰結宇山椒疏壤幽  
岫蓄雲泄雨靄映房櫳浴日涵星翻光池沼震居暇豫



留思幽微研精經藏探求法寶香城實相之談金河常  
樂之說究竟微妙洞遠幽玄掖庭為道心之宮華林構  
重雲之殿師子之座高廣於燈王聽法之筵衆多於方  
丈開寶函之典闡金字之微言顯證一乘宣揚三慧  
辨才無閤遊戲神通莫不皆悟無生成知妄想隨類得  
解俱會真如銘曰形在江湖心超祗鷲思協風雲量包  
宇宙軒瞰蒼波窗承翠嶺須枕煙露擎持光景 沈約  
比丘尼僧敬法師碑曰立言道往標情妙覺置想依空

練心成學緼日悠長疏年緬邈風遷電改斯理莫違神  
有殊適形無異歸臨泉結慟有愴徂暉松飈轉蓋山雨  
披衣載刊貞軌永播餘徽 王僧孺栖玄寺雲法師碑

曰眇眇大家茫茫真樸多淪愛有莫辯塵濁猗歟息心  
言高理邈居之匪絢得之靡學刻情幾種厲想玄覺且  
說且定以披以握來遵北渚至依西岳西岳峨峨北渚  
迴波庭棲弱羽簷挂輕蘿甘麤衣惡棄厚安薄減意囂  
湫寄心寥廓 陳徐陵東陽雙林寺傳大師碑曰自修

禪遠豁絕粒長齋非服流霞若食朝沆姜原所履天步  
可以為儔河流大屐神足宜其相比夫以連城之寶照  
庶之珍野老怪而相捐工人迷而不識昔漢皇愛道樂  
大不臣魏祖優賢揚吏如客河上之老輕舉臨於孝文  
臺下之人高尚加於光武五胡內戾蒼鶩之兆未萌四  
海橫流夷羊之牧匪見滴海未盡其辭懸河不窮其義  
伯陽之德貞桓紀於瀨鄉仲尼之道高碑書於魯縣亦  
有揚雄弟子鄭玄門人俱述清猷載刊玄石銘曰來儀

上國抗禮承明妙辨無相深言不生撞鐘比說擊鼓慙  
英樂論天口誰具與京乍見仙掌爰標神足色豔浮檀  
香踰薝蔔敷敷門人承師若親寧焚軟疊弗燎香薪合  
窟為定方墳以墟須彌巨海變炭揚塵淨土無壤靈儀  
自真何時湧塔復覩全身 江總明慶寺南禪師碑銘  
曰百世之上百世之下含章隱璞明真照假空行已無  
希音和寡不有耆德誰其繼者朗月靈懸高風獨寫  
又建初寺瓊法師碑曰夫智慧精進皆曰第一妙德淨

名並稱不二若乃幹五欲之泥解六情之網禦寶車之  
跡面香城之路荷持像法汲引人倫惟此法師心力備  
矣東山北山之部貫花散花之句並編柳成簡題蒲就  
業學非全朔無待冬書師夢尹儒自知秋駕銘曰屑屑  
人世茫茫大千欲流心火意樹身田老驚靈籥孔惜逝  
川三空莫辯二諦何詮佛日初照慈雲不偏秋露寂滅  
莫繫悠然增唐獨孤及揚州慶雲寺律師一公塔碑  
銘曰茫茫五濁愛習如積何以為師尸羅之戒卓爾立

志於焉懸解持佛密藏俾道勿壞穎脫諸有獄視三界  
上德不器大言無方遺言之文亦知其方發彼蒙求啟  
迪思量我皆令發直心道場奈何法船今也則亡適來  
豈時適去豈順施未及普天乎不憖飛鳥無跡發雷罷  
震福庭空虛來者曷問言之糟粕留為秘印 又舒州  
山谷寺覺寂塔隋故鏡智禪師碑銘曰人之靜也性與  
生皆植知誘於外率為妄識如浪斯鼓與風動息淫駭  
貪怒為刃為賊生死有涯緣起無極如來憫之為闡度

門即妄了真以正覺源啟迪心印貽我後昆間生禪師  
俾以教尊二十八劫迭付微言如二禪師應期弘宣世  
溷法滅獨以道全童蒙求我我以意傳攝相歸性法身  
乃圓性身本空我無說焉如如禪師道既棄世將三十  
紀妙經乃屆皇明昭賁億兆膜拜凡今後學入佛境界  
於取非取誰縛誰解萬有千歲此法不壞 劉軻栖霞  
寺故大德玘律師碑文曰有晉世家地高琅邪產栖霞  
兮宿植有自許身佛氏為釋子兮結鞅纏蓋惠刃中淨

誰何對兮璞琢金鑒潭澄月映本清淨兮尸羅毗尼開  
遮止持作律師兮攝深匡高以遊以遨鏗蒲牢兮梵行  
既立薪傳火襲光岌岌兮 權德輿故章敬寺百巖大  
師碑銘曰西方之教南宗之妙與日並照百巖得之為  
代導師頻若琉璃結火燔性愛流溺正癡冥奔命即心  
是佛即色是空師之通兮無來無去無縛無解師之化  
兮揭茲靈塔丹素周匝示塵劫兮 呂溫南嶽彌陀寺  
承遠和尚碑銘曰浩浩清塵茫茫逝川大雄作矣救物



為先能明大教非師有緣不宰功立忘機智全誰其弘  
之南嶽命代習識虛受應身圓對理則歸空教惟不昧  
未搖本靜行苦神泰雲跡一滅天星六周熱惱就濯童  
蒙來求攝以尊念驅之力修我法有戶誰能不由甘露  
晨晞香雲夕卷彼岸方濟慈舟忽遠爐煙如在塔樹忽  
剪刊勒豐碑永想正眼 白居易撫州景雲寺故律大  
德上弘和尚石塔碑銘曰佛滅度後蒼蘊香裏醍醐味  
醑誰返是香誰復是味景雲大師景雲之生一匡苾芻

中興毗尼景雲之滅衆將安仰法將疇依昔景雲來行道者隨踐跡者歸今景雲去昇堂者思入室者悲爐峰之西虎溪之南石塔巍巍有記事者以真實辭書於塔碑 劉禹錫曹溪六祖大鑒禪師第二碑銘曰至人之生無有種類同人者形出人者智蠢蠢南裔降生傑異父乾母坤獨肖元氣一言頓悟不踐初地五師相承授以寶器宴坐曹溪世號南宗學徒爰來如水之東飲以妙藥瘥其瘡聾詔不能致許為法雄去佛日遠羣言積

億著空執有各走其域我立真詮揭起南國無修而修  
無得而得能使學者還其天識如黑而迷仰見斗極得  
之自然竟不可傳口傳手付則受於有留衣空堂得者  
天授 盧簡求杭州鹽官縣海昌院禪門大師塔碑銘  
曰人心常靈法證常明定慧一相有無俱名於此有得  
自師歸寂近取諸身胡云不識五千尊經何限與義迷  
者見文悟者見意見者無住指即是處醫病未除徒勞  
迴顧我行慈悲示爾蚩蚩無鑿高原自有清池大師之

言一一真詮不疑不怖同歸善緣

原墓誌梁簡文帝同泰寺故功德正智寂師墓誌銘曰  
峰頽木朽波逝江潭山川若此人何以堪亦生亦滅如  
壑如舟千齡俱盡萬古誰留惟茲大士才敏學優幼捐  
蹈火早去吞鈎法雷能響懸河必訓辯才可匹妙德難  
儔 又宋姬寺慧念法師墓誌銘曰電逝生危舟沈道  
滅石拆亡儒星開殞哲是曰人龍亦號僧象慧氣素昭  
英賢夙上善渡愛河能蹇欲網如彼高山法徒斯仰如

彼澄波不測深廣 又甘露鼓寺敬脫法師墓誌銘曰  
岌岌緣假昏昏大夢六塵遠飛四流長控猗嗟大士慧  
舟法棟早擅人龍夙標威鳳善堂間構燈王布席辯河  
流水辭峰積石寂寥兩樹悠漫三泉神明何託暗石空  
傳 又湘宮寺智禔法師墓誌銘曰嗟爾名德超然有  
暉五塵夙離三修允依戒珠靡缺忍鎧無違智燈含影  
慧駕馳騁若韜山金如苞海寶德邁西河聲踰東道伊  
時傾蓋於彼朱方不期而遇襄水之陽掩此方墳悠哉

泉下鬱鬱翠微遼遼平野新盡火滅歸真息假 又淨

居寺法昂墓誌銘曰篠蕩含聳蘭蓀表賢甘露已凝智

泉斯溢頓轡中衢息棹修渚隙漏白駒滕緣黑鼠同志

酸傷交朋哀楚 邵陵王揚州僧正智寂法師墓誌銘

曰緣城虛假欲海漂深三相難久八風易侵實惟上德

為龍為光凝情內瑩被采外揚微言折角精義解頤有

同商生譬彼名醫妙法方永慧水停滋五通軫慕四衆

增悲 陸倕誌法師墓誌銘曰法師自說姓朱名寶誌

其生緣桑梓莫能知之齊故特進吳人張緒興皇寺僧  
法義並見法師於宋太始初出入鍾山往來都邑年可  
五六十歲未知其異也齊宋之交稍顯靈迹被髮徒跣  
負杖挾鏡或徵索酒肴或數日不食豫言未兆懸識他  
心一時之中分身數處天監十三年即化於華林門之  
佛堂先是忽移寺之金剛像出置戶外語僧衆云菩薩  
當去爾後旬日無疾而殞沉舟之痛有切皇心殯葬資  
須事豐供厚望方墳而殞涕瞻白帳而拊心爰詔有司

式刊景行辭曰欲化毗城金粟降靈猗歟大士權迹帝  
京緒胄莫詳邑居罕見譬彼涌出猶如空現哀茲景像  
冥此風電將導舟梁假我方便形煩心寂外荒內辯觀  
往測來觀微知顯動足墟立發言風偃業窮難紹因謝  
弗援慧雲書歇慈燈夜昏 增唐李吉甫杭州徑山寺

大覺禪師墓誌銘曰水無動性風止動滅鏡非塵體塵  
去鏡澈衆生自性本同諸佛求法妄纏坐禪心沒如來  
滅後誰證無生大士密授真源湛明道離言說法潤根



堊師心是法無法修行我體本空空非實性既除我相  
亦遣空病誓如乳毒毒去味正天師得之斯為究竟何  
有涅槃適去他方教無生滅道有行藏不見舟筏空流  
大江蒼蒼遙山成道之所至人應化萬物皆覩報盡形  
滅人亡地古刻頌豐碑永存澗戶

戒律一

增法華經曰精進持淨戒猶如護明珠 教戒經曰受  
諸飲食當如服藥勿生增減如蜂採花但取其味不損

香色 傳燈錄曰律師持戒自縛 白居易曰得徑入

大道乘此不退轉 又曰恩愛捨骨肉飲食斷腥羶

柳宗元文曰修整觀行尊嚴法容以儀範於後學者以  
為持律之宗焉 又曰無得而修故念為實相不取於

法故律為大乘壞衣不飾揣食不味覆薦取役凡出於  
生物者擯而勿用不自知其慈攝取調御凡歸於正真  
者動而成羣不自知其教萬行方厲一性恒如 又曰  
儒以禮立仁義無之則壞佛以律持定慧去之則喪故

離禮於仁義者不可與言儒異律於定慧者不可與言  
佛

戒律二

增維摩經曰會中有一天女以天花散諸菩薩悉皆墮  
落至大弟子便著不墮天女曰結習未盡故花著身結  
習盡者花不著身 神僧傳曰天竺菩提達磨梁武帝  
普通元年汎海至金陵與帝語師知機不契遂去梁折  
蘆渡江止嵩山少林寺終日面壁而坐九年形入石中

拭之益顯人謂其精誠貫金石也 馬祖姓馬名道一

得法於南岳懷讓禪師懷讓得法於六祖讓一日在馬

祖庵前磨甌祖問要作甚麼讓云欲得成鏡祖云磨甌

豈得成鏡讓曰磨甌既不成鏡坐禪豈得成佛耶如牛

駕車不行打車不是打牛即是苦學坐禪禪非坐悟若

學成佛佛無定相馬祖聞之如飲醍醐因此大悟

山堂肆考

### 戒律三

原十誦 五戒

高僧傳云佛若多羅此云功德華嚴窟人專精十誦律部偽秦弘始中振錫入

闍先是律藏未闍鳩摩羅什延請多羅誦出十誦梵本  
羅什譯為晉文三分獲二多羅遵疾未竟而亡後有曇  
摩流支此云法樂西域人以弘始七年達闍中廬山釋  
慧遠聞支善毘尼希得究竟律部遺書通好流支乃與  
羅什共譯十誦都畢 毘尼藏經云五戒一不殺  
生二不偷盜三不邪淫四不妄語五不飲酒食肉 增  
長天秋月 水上青蓮 李白詩戒得長天秋月  
明心如水上青蓮色 三衣

法一鉢歌

湯顯祖詩寒守三衣  
法 飢傳一鉢歌

### 戒律四

原六度

毘尼藏經云布施持戒忍辱精進禪  
定智慧以法能度死生故云六度

六塵

又云

色聲香味觸法忍忍汗  
人之淨心故云六塵

四分

律

三藏

經律  
論

八戒

堅持

九部

經律論各三部

戒珠

詳釋教

法寶

毘尼

毘婆羅論曰善

分別戒名為毘尼藏

小乘

戒律也

律儀

法要

僧律

國章

以法求道

用刑修心

精進勤苦

護持威儀

未及超於解脫

且當攝其威儀

全護珠之念雖在

修行

得捨筏之心豈宜執著

增飛蚊破面

舊相禪學錄云

丁繫自尚書郎參靈度師去官求道日食脫粟二升諸僧鉢水一盂夏月夜坐禪席飛蚊啞食終不搖頭滿面

為蚊破爛

斗盆燒香

王氏彙苑曹務光見趙州以斗盆燒香曰財可得法難求

脇不

至席

又云四祖修行數十年中脇不至席

根不染塵

僧銘云六根不染欲塵之戒

斬新日月

特地乾坤

山堂肆考洛甫禪師在火山典座三年喫百頓棒後來大悟曰

斬新日月  
特地乾坤

閑邪以律

謝靈運作  
慧遠碑

守律護戒

張燕公集

非獨心長淨衣無一點塵

姚少監詩

戒律五

原詩梁庾肩吾和太子重雲殿受戒詩曰皇明執東曜

帝宸居北辰小乘開治道大覺拯蒼民殊途同義路分

流合智津傳香引上德列伎進名臣連閣翻如畫圖雲

更似真鏡山銜殿影梅梁落梵塵苑桂恒留雪天花不

待春萬年逢瑞應千生值法身  
天衣初拂石豆火欲然  
薪重善終無報輕毛庶有因  
釋慧令和受戒詩曰沈

寥秋氣爽搖落寒林疎風散飛  
廉雀浪動昆明魚是日  
何為盛證戒奉皇儲願陪升自  
在神通任卷舒 增唐  
僧皎然送志弘沙彌赴上元受  
戒詩曰不肯資章甫勝  
衣被木蘭今隨秣陵信欲及蔡  
州壇野寺鐘聲遠春山  
戒足寒歸來次第學應見後心  
難

禪定一



增傳燈錄云禪有深淺階級殊等粘帶異計欣上厭下而修者是外道禪正信因果亦以欣厭而修者是凡夫禪悟我空偏真之理而修者是小乘禪悟我法二空所顯真理而修者是大乘禪若頓悟自心本來清淨元無煩惱無漏智性本自具足此心即佛依此而修者是最上乘禪亦名如來清淨宗密禪

禪定二

增傳燈錄云唐中宗遣內侍薛簡迎六祖簡問曰不以

智慧照破煩惱憑何出離祖曰爾言是小乘簡曰請大  
乘見解祖曰明與無明其性無二無二之性即是實性  
凡愚不滅聖賢不增住煩惱而不亂居禪定而不寂不  
斷不常不來不去性相如如常住不遷謂之曰道 又  
曰智隍禪師問六祖以何為禪定元策祖曰我師示我  
曰妙湛圓寂體用如如五陰本空六塵非有不出不入  
不定不亂禪性無住離住禪寂禪性無生離生禪想心  
如虛空亦無虛空之量 又云法要有三戒定慧也戒

生定定生慧慧生八萬四千法門是三者迭為用也然  
惟戒而後能定定而後能慧亦惟慧而後能戒其作用  
則一耳

### 禪定三

原不二 歸一

不二法門  
萬法歸一乘

超岸 入地

超彼岸也  
決定經

云不捨初地入於  
二地乃至十地

法眼

妙心

佛未涅槃時每告弟  
子迦葉曰吾以清淨

法眼涅槃妙心實相正法將  
付與汝汝可流布無令斷絕

增止觀

定慧

荆溪祖  
師咨啟

左溪尊者某於疇昔之夜夢被僧服腕挾兩輪而遊於  
大河左溪曰汝當以止觀之道而度生乎果籤釋止觀

以開後人佛經云止能捨樂觀能離苦觀經云鼓兩翼以高飛喻定慧之豎徹馳二輪而致遠喻止觀之橫周金陵語錄云定有出定入定意非若止無所不定慧者見微而已非若觀無所不見故定慧為菩薩止觀為佛

燕子

桃花

語錄云莫怪道人掛

不聞不見

無念無營

傳燈錄云壽州道樹禪師結茅三峰山下有野人言談詭異師曰野人多色伎倆只

消老人不聞不見伊伎倆有窮吾不聞不見無盡下詳經一

禪定四

增一味禪學

廣語曰有僧辭歸宗云往諸方學五味禪歸宗云我這裡有一味禪為甚不學

一指頭禪

俱眠和尚問天龍舉一指示之豁然頓悟號一指頭禪

原正覺利

根 八戒 四禪 入定 安禪 歸空 離相 悟

法 斷言 捨筏 忘筌 次第之禪 真如之理

如悟三空 終超十地 定慧齊修 身心無著 有

漏之身 無生之理 無我之真相 有緣之勝果

乘不退之輪 證無生之觀 解法藏之緘縢 啟禪

關之扃鐸 增攝亂以定 謝靈運碑 身縛禪寂 杜荀鶴詩 光

明徧照 智見獨存 王維 苦海莫能漂 劫火不能焚

白樂天 久披山衲壞 孤坐石牀寒 文苑英華 靜故了羣

動空故納萬境

東坡詩

禪定五

原序梁武帝小亮法師涅槃疏序曰非言無以寄言言即無言之累累言則可以息言言息則諸見競起所以如來乘本願以託生現慈力以應化離文字以設教忘心相以通道欲使珉玉異價涇渭分流佛性開其本有之源涅槃明其歸極之宗非因非果不起不作

增詩唐張喬贈仰山禪師歸曹溪詩曰曹溪松下路猿

鳥重相親四海求玄理千峰遶定身異花天上墮靈草  
雪中春自惜經行處焚香禮舊真 宋王鉉芳庭植上

人詩曰苔侵坐處石頭青滿屋春雲不用扃入定醒來  
香印冷一簾花雨濕殘經 釋淨端寄懷勒潭山月禪

師詩曰聞道安禪處松蘿香隔溪清猿定中發幽鳥坐  
邊栖雲影朝晡別山峰遠近齊不知誰問法雪夜立江  
西 元張憲寄中山隱講師詩曰問訊山中隱中山第  
幾重風廊巡夜虎雲鉢聽經龍流水千溪月寒岩一樹

松無因淨渣滓來共上堂鐘 白雲上人宿睦州祖師  
庵詩曰庵依兜率寺山憩俗心灰竹密暑不到窗虛風  
自來山昏飛鶴下磬斷定僧回拂拭殘碑看年深厚綠  
苔

御定淵鑑類函卷三百十七



謹案第十九頁後一行始遊羅衛刊本遊訛由據  
唐類函改

第二十三頁前六行真淨無瑕刊本真淨訛海靜  
直至寶所刊本直至訛真其並據顏書多寶塔  
碑文改

第二十三頁後五行定養胎染生死迷轂按顏書  
多寶塔碑文作定養聖胎染生迷轂





總校官庶吉士臣張能照

校對官檢討臣王福清

謄錄監生臣楊邦彥